



**Komunikadu Imprensa**

**15 Marsu 2021**

**Parlamentu Nasional**

**JSMP preokupa ho membru órgaun lejislativu ne’ebé hakilar no insulta malu iha  
Parlamentu Nasional tanba de’it kestaun política partidária**

JSMP preokupa ho membru órgaun lejislativa iha Parlamentu Nasional(PN) ne’ebé halo intervensaun la’ós hanesan reprezentante povu hodi levanta preokupasaun no interese povu nian maibé halo PN hanesan fatin hakilar no insulta malu ba interese política partidaria.

Durante observasaun iha 09 Marsu 2021, iha reuniaun plenária PN, JSMP observa katak deputadu sira hasai liafuan “*kakutak feruzen, pikun, frustadu, no asaltu podér*” hodi hamosu diskusaun manas entre deputadu KHUNTO, CNRT, no Fretilin.

“Parlamentu Nasional nu’udar Órgaun Soberanu ida ne’ebé reprezenta povu hodi hala’o lei, fiskalizasaun no foti desizaun política, tuir lolos hatudu sira-nia kualidade serbisu liuhusi halo intervensaun política ho linguajen ne’ebé appropriadu, dignifika PN hanesan Órgaun Soberanu no reprezentante povu hodi ko’alia no diskute kona-ba problema no interese povu nian, la’ós interese pesoál, grupu ka partidária. Kestaun interese política partidária iha Estadu Direitu Demokrátika iha dalan, mekanizmu no fatin próprio hodi bele rezolve, la’ós iha Parlamentu Nasional,” dehan Diretora ezekutivu JSMP, Ana Paula Marçal.

Situasaun ne’e hahú bainhira deputadu husi bankada KHUNTO halo deklarasaun política hodi rezeita deklarasaun política husi bankada CNRT ne’ebé insulta Vise-Ministru Interiór katak halo abuzu podér no la aseita ho intervensaun deputadu sira husi Bankada CNRT nia linguajen ne’ebé hasai ba konselleiru Superiór KHUNTO katak kakutak feruzen.

Alende ne’e deputadu CNRT hakilar ba Prezidente no Vise-Prezidente PN katak asaltu podér. Hatan ba akuzasaun CNRT nian ne’e, deputadu sira husi Bankada Fretilin no KHUNTO hateten katak la asaltu podér no iha demokrasia ne’e uza kakutak la’ós uza forsa.

JSMP dalabarak ona kestiona práтика no atitude hirak ne’e liuhusi JSMP nia relatório anuál nune’e mós iha komunikasaun imprensa sira maibé membru órgaun lejislativa sira kontinua ignora regra sira no prosedimentu sira ne’ebé aplika iha PN.

Iha provizaun pontu 2) Artigu 10 Rejimentu Parlamentu Nasionál regula kona-ba devér deputadu sira nian iha hala'o sira nia knaar. Provizaun alinea a) prevee katak respeita dignidade Parlamentu Nasionál no deputadu sira nian, alinea b) prevee katak halo tuir orden no dixiplina sira iha Rejimentu no hatudu respeitu ba autoridade Presidente Parlamentu no iha alinea c) prevee katak kontribui liuhusi halalok deputadu sira nian ba efikásia no prestíjiu serbisu sira Parlamentu nian. JSMP haree katak hahalok deputadu sira nian ne'e la tuir sira-nia devér ne'ebé Rejimentu haruka.

Nune'e, JSMP husu ba membru deputadu sira Parlamentu Nasionál atu ezerse sira-nia knaar nafatin observa ka kumpri regra dixiplinár no sira-nia devér sira ne'ebé regula iha Rejimentu Parlamentu Nasionál no lei relevante sira seluk, nune'e bele prezerva dignidade Parlamentu Nasionál no promove efetividade serbisu Parlamentu Nasionál nian.

Atu hetan informasaun liutan favór kontaktu:

Ana Paula Marçal  
Diretora Ezekutiva JSMP  
Diresaun e-mail: [ana@jsmp.tl](mailto:ana@jsmp.tl)  
Website: <http://jsmp.tl>

Rua Beco Lakateu, Aldeia Manufuik,  
SukuColmera, Administrativu Vera Cruz  
Dili Timor Leste  
PoBox: 275  
Telefone: 3323883 | 77040735  
[www.jsmp.tl](http://www.jsmp.tl)  
[ana@jsmp.tl](mailto:ana@jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPtl